

Գրեաց օսլա և ինքն յայտ արարեալ զբանս թղթոց միաբանացն Երուսաղէմի, ուր յաւելու ասել. «Արդ աղաչեմք և մեք զվաճառականս և զիշխանս Հայոց, գրել առ վարդապետս իւրեանց սիրել զխաղաղութիւն եւ երթալ զհետ նորա, որպէս և մեք. զի երկոքին ազգքս հպատակեմք Արքայի, և չէ արժան լինել գայթակղութեան 'ի միջի մերում, և վերստին աղաչեմք առաքել զգիր մեր առ նոսա, զի գիտացեն և ծանիցեն զամենայն, և լինիցին իսկ պատուելիք ըստ անուանց իւրեանց»:

Ի սմին ժամանակի եհաս յերուսաղէմ Յակոբ վարդապետ Նաբեան ընդ ուխտաւորս, ունելով ընդ ինքեան եւ զոմանս 'ի վարդապետաց: Սա երբ ընդ իւր զպատուական չուրջառս, վարադոյրս և այլ ազնիւ ընծայս 'ի Յովհաննոս Պատրիարքէ, զոր ընկալեալ Գրիգորի, բերկրեցաւ յոյժ, մանաւանդ 'ի տեսանելն զՅակոբ վարդապետ. զի նովաւ ելից զվախազ սրտի իւրոյ, որ ունէր առ Յովհաննէս. զի բազում անգամ յորդորեալ էր զնա գալ յերուսաղէմ և մխիթարել զինքն վասն մահուան Աթուակալ Հաննա վարդապետի, յորոյ վերայ անմխիթար սգայր. այլ չեղեւ հնար 'ի խառնակութենէ ժամանակին, մանաւանդ սկիզբն առեալ էր ծագիլ խնդիրն Յունաց: Եկն 'ի սոցն առուրս յերուսաղէմ և մեծ Պեկ ոմն, այր բարի և ծանօթ Սեղբոս Ամիրայի. գնաց առ նա Գրիգոր Պատրիարք ընծայիւք՝ առեալ ընդ իւր և զՅակոբ վարդապետ, առաքեալ էր առ նա ազնիւ ընծայս նաեւ Յովհաննէս Պատրիարք, որ և մատուցին առ նա, և դարձան յետս, (1734 'ի 14 Սեպտեմբեր ամսոյ):

Իսկ Պատրիարքն Յունաց էառ գաղտ հրովարտակ արքունուստ, զի յաւուր Ճրագալուցի Պասեքին ինքն միայն մտցէ 'ի Գերեզմանն Քրիստոսի և 'ի բաց վարեացէ զՀայս. և առաքեաց զայն յերուսաղէմ և ետ արձանագրել ծածկապէս 'ի դատարանն. ազգ արարին ոմանք զգործն Գրիգորի Պատրիարքի 'ի ձեռն թարգմանին Պօղոսի. ընդ որ զարմացեալ յոյժ, մանաւանդ 'ի վերայ կեղծ բարեկամութեան Յունաց, առաքեաց և ինքն զհրովարտական, և ըստ մտաց նոցին էառ գիր 'ի դատաւորէն եւ զպատճէն հրովարտակին այնմիկ և առաքեաց առ Յովհաննէս Պատրի-